

四庫全書

集部

欽定四庫全書

御定全唐詩錄卷五十九

白居易

二

古體詩

二

寓意詩

豫樟生深山七年而後知挺高二百丈本末皆十圍天子建明堂此材獨中規匠人執斤墨米度將有期孟冬草木枯烈火燎山陂疾風吹猛焰從根燒到枝養材三

十年方成棟梁姿一朝為灰燼柯葉無子遺地雖生爾  
材天不與爾時不如糞土英猶有人掇之已矣勿重陳  
重陳令人悲不悲焚燒苦但悲米用遲

赫赫京內史炎炎中書郎昨傳徵拜日恩賜頗殊常貂  
冠水蒼玉紫綬黃金章佩服身未暖已聞竄遐荒親戚  
不得別吞聲泣路旁賓客亦已散門前雀羅張富貴來  
不久倏如瓦溝霜權勢去尤速瞥若石火光不如守貧  
賤貧賤可久長傳語宦遊子且來歸故鄉

促織不成章提壺但聞聲嗟哉蟲與鳥無實有虛名與  
君定交日久要如弟兄何以示誠信白水指為盟雲雨  
一為別飛沉兩難并君為得風鵬我為失水鯨音信日  
已疎恩分日已輕窮通尚如此何況死與生乃知擇交  
難須有知人明莫將山上松結託水上萍

翩翩兩玄鳥本是同巢燕分飛來幾時秋夏炎涼變一  
宿蓬華廬一棲明光殿偶因銜泥處復得重相見彼矜  
杏梁貴此嗟茅棟賤眼看秋社至兩處俱難戀所托各

暫時胡為相歎美

婆娑園中樹根株大合圍蠢爾樹間蟲形質一何微孰謂蟲之微蟲蠹已無期孰謂樹之大花葉有衰時花衰夏未實葉病秋先萎樹心半為土觀者安得知借問蟲何在在身在不在枝借問蟲何食食心不食皮豈無啄木鳥背長將何為

和答詩十首

并序選  
四首

五年春微之從東臺來不數日又左轉為江陵  
士曹掾詔下日會予下內直歸而微之已即路

邂逅相遇於街衢中自永壽寺南抵新昌里北  
得馬上話別語不過相勉保方寸外形骸而已  
因不暇及他是夕足下次於山北寺僕職役不  
得去命季弟送行且奉新詩一軸致於執事凡  
二十章率有比興淫文艷韻無一字焉意者欲  
足下在途諷讀且以遣日時消憂懣又有以張  
直氣而扶壯心也及足下到江陵寄在路所為  
詩十七章凡五六千言言有為章有旨迨於宮

律體裁皆得作者風發絨開卷且喜且怪僕思  
牛僧孺戒不能示他人唯與杓直拒非及樊宗  
師輩三四人時一吟讀心甚貴重然竊思之豈  
僕所奉者二十章遽能開足下聰明使之然也  
抑又知足下是行也天將屈足下之道激足  
下之心使感時發憤而臻於此耶若兩不然者  
何立意措辭與足下前時詩如此之相遠也僕  
既羨足下詩又憐足下心盡欲引狂簡而和之

屬直宿拘牽居無暇日故不即時如意旬月來  
多乞病假假中稍閒且摘卷中尤者繼成十章  
亦不下三千言其間所見同者固不能自異異  
者亦不能強同同者謂之和異者謂之答并別  
錄和夢遊春詩一章各附於本篇之末餘未和  
者亦續致之頃者在科試間常與足下同筆硯  
每下筆時輒相顧共患其意太切而理太周故  
理太周則辭繁意太切則言激然與足下為文



所長在於此所病亦在於此足下來叙果有詞  
犯文繁之說今僕所和者猶前病也待與足下  
相見日各引所作稍刪其繁而晦其義焉餘具  
書白

和思歸樂

山中不棲鳥夜半聲嚶嚶似道思歸樂行人掩泣聽皆  
疑此山路遷客多南征憂憤氣不散結化為精靈我謂  
此山鳥本不因人生人心自懷土想作思歸鳴孟嘗平

居時娛耳琴泠泠雍門一言感未奏淚沾纓魏武銅雀  
妓日與歡樂并一旦西陵望欲歌先涕零峽猿亦何意  
隴水復何情為入愁人耳皆為腸斷聲請看元侍御亦  
宿此郵亭因聽思歸鳥神氣獨安寧問君何以然道勝  
心自平雖為南遷客如在長安城云得此道來何慮亦  
何營窮達有前定憂喜無交爭所以事君日持憲立大  
庭雖有回天力撓之終不傾況始三十餘年少有直名  
心中志氣大眼前爵祿輕君恩若雨露君威若雷霆退

不苟免難進不曲求榮在火辨玉性經霜識松貞展禽  
任三黜靈均長獨醒獲戾自東洛貶官向南荆再拜辭  
闕下長揖別公卿荊州又非遠驛路半月程漢水照天  
碧楚山插雲青江陵橘似珠宜城酒如餉誰謂謫謫去  
未妨遊賞行人生百歲內天地暫寓形太倉一稊米大  
海一浮萍身委逍遙篇心付頭陀經尚達死生觀寧為  
寵辱驚中懷苟有主外物安能縈任意思歸樂聲聲啼  
到明

和陽城驛

商山陽城驛中有歎者誰云是元監察江陵謫去時忽  
見此驛名良久涕欲垂何故陽道州名姓同於斯憐君  
一寸心寵辱誓不移疾惡若巷伯好賢如緇衣沉吟不  
能去意者欲改為改為避賢驛大署於門楣荆人愛羊  
祜戶曹改為祠一字不忍道况兼姓呼之因題八百言  
言直文甚奇詩成寄與我鏗若金和絲上言陽公行友  
悌無等夷骨肉同衾裯至死不相離次言陽公迹夏邑

始棲遲鄉人化其風少長皆孝慈次言陽公道終日對  
酒卮兄弟笑相顧醉貌紅怡怡次言陽公節蹇蹇居諫  
司誓心除國蠹決死犯天威終言陽公命左遷天一涯  
道州炎瘴地身不得生歸一一皆實錄事事無子遺凡  
是為善者聞之惻然悲道州既已矣往者不可追何世  
無其人來者亦可思願以君子文告彼大樂師附於雅  
歌末奏之白玉墀天子聞此章教化如法施直諫從如  
流佞臣惡如疵宰相聞此章政柄端正持進賢不知倦

去邪勿復疑憲臣聞此章不敢懷依違諫官聞此章不  
忍縱詭隨然後告史氏舊史有前規若作陽公傳欲令  
後世知不勞叙世家不用費文辭但使國史上全錄元  
稹詩

答桐花

山木多蓊鬱茲桐獨亭亭葉重碧雲片花簇紫霞英是  
時三月天春暖山雨晴夜色向月淺闇香隨風輕行者  
多商賈居者悉黎民無人解賞愛有客獨屏營手攀花

枝立足躡花影行生憐不得所死欲揚其聲截為天子  
琴刻作古人形云待我成器薦之於穆清誠是君子心  
恐非草木情胡為愛其華而反傷其生老龜被剝腸不  
如無神靈雄鷄自斷尾不願為犧牲況此好顏色花紫  
葉青青宜遂天地性忍加刀斧刑我思五丁力拔入九  
重城當君正殿栽花葉生光晶上對月中桂下覆堦前  
漠汎拂香爐煙隱映斧藻屏為君發清韻泠泠如叩瓊  
風來聲滿耳鄭衛不足聽受君封植力不獨吐芬馨助

君行春令開花應晴明受君雨露恩不獨含芳榮戒君  
無戲言剪葉封弟兄受君歲月功不獨資生成為君長  
高枝鳳凰上頭鳴一鳴君萬歲壽如山不傾再鳴萬人  
泰泰階為之平如何有此用幽滞在巖坳歲月不爾駐  
孤芳坐凋零請向桐枝上為余題姓名待余有勢力移  
爾獻丹庭

和大觜鳥

鳥者種有二名同性不同觜小者慈孝觜大者貪庸觜



大命又長生來十餘冬物老顏色變頭毛白茸茸飛來  
亭樹上初但驚兒童老巫生奸計與鳥意潛通云是非  
凡鳥遙見起敬恭千歲乃一出喜賀主人翁祥瑞來白  
日神靈占知風陰作北斗使能為人吉凶此鳥所止家  
家產日夜豐上以致壽考下可宜田農主人富家子身  
老心童蒙隨巫拜復祝婦姑亦相從殺鷄薦其肉敬若  
裡六宗鳥喜張大背飛接在虛空鳥既飽羶腥巫亦饗  
甘濃鳥巫互相利不復兩西東日日營巢窟稍稍近房

櫛雖生八九子誰辨其雌雄羣雛又長成衆皆逞殘兇  
援巢吞燕卵入簇啄蠶蟲豈無乘秋隼羈絆委高墉但  
食烏殘肉無施搏擊功亦有能言鸚翅碧背距紅暫曾  
說烏罪囚閉在深籠青青窻前柳鬱鬱井上桐貪烏占  
棲息慈烏獨不容慈烏爾奚為來往何憧憧曉去先晨  
鼓暮歸後昏鐘辛苦塵土間飛啄禾黍叢得食將母哺  
飢腸不自充主人憎慈烏命子削彈弓絃續會稽竹丸  
鑄荆山銅慈烏求母食飛下爾庭中數粒未入口一丸

已中宵仰天號一聲似欲訴蒼穹反哺日未足非是惜  
微躬誰能持此冤一為問化工胡然大觜烏竟得天年  
終

有木詩

并序

余嘗讀漢書列傳見佞順嬖佞圖身忘國如張  
禹輩者見惑上蠱下交亂君親如江充輩者見  
暴狠跋扈壅君樹黨如梁冀輩者見色仁行違  
先德後賊如王莽輩者又見外狀恢弘中無實

用者又見附離權勢隨之覆亡者其初皆有動  
人之才足以惑衆媚主莫不合於始而敗於終  
也因引風人騷人之興賦有木八章不獨諷前  
人亦儆後代爾

有木名弱柳結根近清池風煙借顏色雨露助華滋  
我白雪毛嫋嫋青絲枝漸密陰自庇轉高梢四垂截枝  
扶為杖軟弱不自持折條用樊園柔脆非其宜為樹信  
可翫論材何所施可惜金堤地栽之徒爾為

有木名櫻桃得地早滋茂葉密獨承日花繁偏受露迎  
風閣搖動引鳥自來去鳥啄子難成風來枝莫住低軟  
易攀翫佳人屢迴顧色求桃李饒心向松筠妬好是映  
牆花本非當軒樹所以姓蕭人曾為伐櫻賦

有木秋不凋青青在江北謂為洞庭橘美人自移植上  
受顧盼恩下勤澆溉力實成乃是枳臭苦不堪食物有  
似是者真偽何由識美人默無言對之長歎息中含害  
物意外矯凌霜色仍向枝葉間潛生刺如棘

有木名杜梨陰森覆丘壑心蠹已空朽根深尚盤薄媚  
狐言語巧天鳥聲音惡憑此為巢穴往來互棲託四傍  
五六本枝葉相交錯借問因何生秋風吹子落為長社  
壇下無人敢芟斲幾度野火來風迴燒不着

有木香冉冉山頭生一發主人不知名移種近軒闥愛  
其有芳味因以調麪蘖前後曾飲者十人無一活豈徒  
悔封植兼亦誤采掇試問識藥人始知名野葛年深已  
滋蔓刀斧不可伐何時猛風來為我連枝拔

有木名水檉遠望青童童根株非勁挺柯葉多蒙龍彩  
翠色如栢鱗皴皮似松為同松栢類得列嘉樹中枝弱  
不勝雪勢高常懼風雪壓低還舉風吹西復東柔芳甚  
楊柳早落先梧桐惟有一堪賞心中無蠹蟲

有木名凌霄擢秀非孤標偶依一株樹遂抽百尺條託  
根附樹身開花寄樹梢自謂得其勢無因有動搖一旦  
樹摧倒獨立暫飄颻疾風從東起吹折不終朝朝為拂  
雲花暮為委地樵寄言立身者勿學柔弱苗

有木名丹桂四時香馥馥花團夜雪明葉剪春雲綠風  
影清似水霜枝冷如玉獨占小山幽不容凡鳥宿匠人  
愛芳直裁截為厦屋榦細力未成用之君自速重任雖  
大過直心終不曲縱非梁棟材猶勝尋常木

青塚

上有飢雁號下有枯蓬走茫茫邊雪裏一掬沙培塿傳  
是昭君墓埋閉蛾眉久凝脂化為泥鉛黛復何有時有  
陰怨氣常生墳左右鬱鬱如苦霧不隨骨銷朽婦人無



他才榮枯繫妍否何乃明妃命獨懸畫工手丹青一註  
誤白黑相紛紜遂使君眼中西施作嫫母同儕傾寵幸  
異類為配偶禍福安可知美顏不如醜何言一時事可  
戒千年後特報後來姝不須倚眉首無辭挿荆釵嫁作  
貧家婦不見青塚上行人為澆酒

常樂里閒居偶題十六韻兼寄劉十五公與王十  
一起呂二炁呂四頤崔十八玄亮元九稹劉三  
十二敦質張十五仲元時為校書郎

帝都名利場，鷄鳴無安居。獨有懶慢者，日高頭未梳。工拙性不同，進退迹遂殊。幸逢太平代，天子好文儒。小才難大用，典校在秘書。三旬兩入省，因得養頑疎。茅屋四五間，一馬二僕夫。俸錢萬六千，月給亦有餘。既無衣食牽，亦少人事拘。遂使少年心，日日常晏如。勿言無知己，躁靜各有徒。蘭臺七人出，處與之俱。旬時阻談笑，旦夕望軒車。誰能讎校閒，解帶卧吾廬。窻前有竹翫，門外有酒沽。何以待君子，數竿對一壺。

答元八宗簡同遊曲江後明日見贈

長安千萬人出門各有營  
唯我與夫子信馬悠悠行  
行到曲江頭反照草樹明  
南山好顏色病客有心情  
水禽翻白羽風荷嫋翠莖  
何必滄浪去即此可濯纓  
時景不重來賞心難再并  
坐愁紅塵裏夕鼓鼙鼙聲  
歸來經一宿世慮稍復生  
賴聞瑤華唱再得塵襟清

松聲

修竹里張家宅南亭作

月好好獨坐雙松在前軒  
西南微風來潛入枝葉間  
蕭

寥發為聲半夜明月前寒山颯颯雨秋琴泠泠絃一聞  
滌炎暑再聽破昏煩竟夕遂不寐心體俱脩然南陌車  
馬動西隣歌吹繁誰知茲簷下滿耳不為喧

寄李十建

外事牽我形外物誘我情李君別來久徧恹從中生憶  
昨訪君時立馬叩柴荆有時君未起稚子喜先迎連步  
笑出門衣翻冠或傾掃堦苔紋綠拂榻藤陰清家醞及  
春熟園葵乘露烹看山東亭坐待月南原行門靜惟鳥

語坊遠少鼓聲相對盡日言不及利與名分手來幾時  
明月三四盈別時殘花落及此新蟬鳴芳歲忽已晚離  
抱悵未平豈不思命駕吏職坐相縈前時君有期訪我  
來山城心賞久云阻言約無自輕相去幸非遠走馬一  
日程

禁中曉卧因懷王起居

遲日禁漏盡悄悄暝鴉喧夜雨槐花落微涼卧北軒曙  
燈殘未滅風簾閒自翻每得一靜境思與故人言

禁中偶直夢遊仙遊寺

西軒草詔暇松竹深寂寂月出清風來忽是山中夕因  
成西南夢夢作遊仙客覺聞宮漏聲猶謂山泉滴

秋山

久病曠心賞今朝一登山山秋雲物冷稱我清羸顏白  
石卧可枕青蘿行可攀意中如有得盡日不欲還人生  
無幾何如寄天地間心有千載憂身無一日閒何時解  
塵網此地來掩關

效陶潛體詩 并序

余退居渭上杜門不出時屬多雨無以自娛會  
家醞新熟雨中獨飲徃徃酣醉終日不醒懶放  
之心彌覺自得故得於此而有以忘於彼者因  
詠陶淵明詩適與意會遂效其體成十六篇醉  
中狂言醒輒自哂然知我者亦無隱焉

今錄  
九篇

翳翳踰月陰沉沉連日雨開簾望天色黃雲暗如土行  
潦毀我墉疾風壞我宇蓬莠生庭院泥塗失場圃邛深

絕賓客窻晦無儔侶盡日不下牀跳鼃時入戶出門無  
所往入室還獨處不以酒自娛塊然與誰語

朝飲一杯酒冥心合元化兀然無所思日高尚閒卧暮  
讀一卷書會意如嘉話欣然有所遇夜深猶獨坐又得  
琴上趣安絃有餘暇復得詩中狂下筆不能罷惟茲三  
四事特用度晝夜所以陰雨中經旬不出舍始悟獨住  
人心安時亦過

東家采桑婦雨來苦愁悲簇蠶北堂前雨冷不成絲西



家荷鋤叟雨來亦怨咨種豆南山下雨多落為箕而我  
獨何幸醞酒本無期及此多雨日正遇新熟時開瓶瀉  
樽中玉液黃金脂持翫已可悅歡嘗有餘滋一酌發好  
容再酌開愁眉速進四五酌酣暢入四肢忽然遺我物  
誰復分是非是時連夕雨酩酊無所知人心苦顛倒反  
為憂者嗤

天秋無片雲地靜無纖塵團團新晴月林下生白輪憶  
昨陰霖天連連三四旬賴逢家醞熟不覺過朝昏私言

雨霽後可以罷餘樽及對新月色不醉亦愁人牀頭殘  
酒榼欲盡味彌淳攜置南簷下舉酌自殷勤清光入盃  
杓白露生衣巾乃知陰與晴安可無此君我有樂府詩  
成來人未聞今宵醉有興狂詠驚四鄰獨賞猶復爾何  
況有交親

中秋三五夜明月在前軒臨觴忽不飲憶我平生歡我  
有同心人邈邈崔與錢我有忘形友迢迢李與元或飛  
青雲上或落江湖間與我不相見于今三四年我無縮

地街君非馭風仙安得明月下四人來晤言良夜信難  
得佳期杳無緣明月又不住漸下西南天豈無他時會  
惜此清景前

家醞飲已盡村中無酒沽坐愁今夜醒其奈秋懷何有  
客忽叩門言語一何佳云是南村叟挈榼來相過且喜  
樽不燥安問少與多重陽雖已過籬菊有殘花歡來苦  
晝短不覺夕陽斜老人勿遽起且待新月華客去有餘  
趣竟夕獨酣歌

原生衣百結顏子食一簞歡然樂其志有以忘飢寒今  
我何人哉德不比先賢衣食幸相屬胡為不自安況茲  
清渭曲居處安且閒榆柳百餘樹茅茨數十間寒負簷  
下日熱濯澗底泉日出猶未起日入已復眠西風滿村  
巷清涼八月天但有鷄犬聲不聞車馬喧時傾一樽酒  
坐望東南山稚姪初學步牽衣戲我前即此自可樂庶  
幾顏與原

煙霞隔玄圃風波限瀛洲我豈不欲往大海路阻修神

仙但聞說靈藥不可求長生無得者舉世如蜉蝣逝者  
不重迴存者難久留踟躕未死間何苦懷百憂念此忽  
內熱坐看成白頭舉杯還獨飲顧影自獻酬心與口相  
約未醉勿言休今朝不盡醉知有明朝否不見郭門外  
累累墳塋與丘明月愁殺人黃蒿風颼颼死者若有知悔  
不秉燭遊

吾聞潯陽郡昔有陶徵君愛酒不愛名憂醒不憂貧嘗  
為彭澤令在官纔八旬愀然忽不樂掛印著公門口吟

歸去來頭戴漉酒巾人吏留不得直入故山雲歸來五  
柳下還以酒養真人間榮與利擺落如泥塵先生去已  
久紙墨有遺文篇篇勸我飲此外無所云我從老大來  
竊慕其為人其他不可及且微醉昏昏

渭上偶釣

渭水如鏡色中有鯉與魴偶持一竿竹懸釣在其傍微  
風吹釣絲嫋嫋十尺長身雖對魚坐心在無何鄉昔有  
白頭人亦釣此渭陽釣人不釣魚七十得文王況我垂

釣意人魚亦兼忘無機兩不得但弄秋水光興盡釣亦罷歸來飲我觴

春眠

新浴肢體暢獨寢神魄安  
沉因夜深坐遂成日高眠  
春被薄亦暖朝窗深更閒  
却忘人間事似得枕上仙  
至適無夢想大和難名言  
全勝彭澤醉欲敵曹溪禪  
何物呼我覺伯勞聲關關  
起來妻子笑生計春茫然

晚春沽酒

百花落如雪兩鬢垂作絲春去有來日我老無少時人  
生待富貴為樂常苦遲不如貧賤日隨分開愁眉賣我  
所乘馬典我舊朝衣盡將沽酒飲酩酊步行歸名姓日  
隱晦形骸日變衰醉卧黃公肆人知我是誰

秋遊原上

七月行已半早涼天氣清清晨起巾櫛徐步出柴荆露  
杖筇竹冷風襟越蕉輕間攜弟姪輩同上秋原行新棗  
未全赤晚瓜有餘馨依依田家叟設此相逢迎自我到



此邨往來白髮生村中相識久老幼皆有情留連向暮  
歸樹樹風蟬鳴是時新雨足禾黍夾道青見此令人飽  
何必待西成

東園翫菊

少年昨已去芳歲今又闌如何寂寞意復此荒涼園  
中獨立久日淡風露寒秋蔬盡蕪沒好樹亦凋殘惟有  
數叢菊新開籬落間攜觴聊就酌為爾一留連憶我少  
小日易為興所牽見酒無時節未飲心欣然近從年長

來漸覺取樂難常恐更衰老強飲亦無歡顧謂爾菊花  
後時何獨鮮誠知不為我借爾暫開顏

觀稼

世役不我牽身心常自若晚出看田畝閒行傍村落  
纍纍繞場稼嘖嘖羣飛雀年豐豈獨人禽鳥聲亦樂  
田翁逢我喜默起具杯杓歛手笑相延社酒有殘酌  
愧茲勤且敬藜杖為掩泊言動任天真未覺農人惡  
停杯問生事夫種妻兒獲筋力苦疲勞衣食常單薄  
自慙祿仕者

不曾營農作飽食無所勞何殊衛人鶴

冬夜

家貧親愛散身病交遊罷眼前無一人獨掩村齋卧冷落燈火閤離披簾幕破策策窻戶前又聞新雪下長年漸省睡夜半起端坐不學坐忘心寂寞安可過兀然身寄世浩然心委化如此來四年一千三百夜

遊悟貞寺詩

一百三十韻

元和九年秋八月月上弦我遊悟貞寺寺在王順山去

山四五里先聞水潺湲自茲捨車馬始步藍溪灣手拄  
青竹杖足躅白石灘漸怪耳目曠不聞人世喧山下望  
山上初疑不可攀誰知中有路盤折通巖巔一息憊竿  
下再休石龕邊龕閒長丈餘門戶無扃關仰窺不見人  
石髮垂若鬟驚出白蝙蝠雙飛如雪翻回首寺門望青  
崖夾朱軒如擘山腹開置寺于其間入門無平地地窄  
虛空寬房廊與臺殿高下隨峯巒巖崿無撮土樹木多  
瘦堅根株抱石長屈曲蟲蛇蟠松桂亂無行四時鬱芊

半枝梢嫋青翠韻若風中絃  
日月光不透綠陰相交延  
幽鳥時一聲聞之似寒蟬  
首憩賓位亭就坐未及安  
須臾開北戶萬里明豁然  
拂檐虹霏微遠棟雲回旋  
赤日間白雨陰晴同一川  
野綠簇草樹眼界吞秦原  
渭水細不見漢陵小于拳  
却顧來時路縈紆映朱欄  
歷歷上山人一遙可觀前  
對多寶塔風鐸鳴四端  
欒櫨與戶牖怡怡金碧繁  
云昔伽葉佛此地坐涅槃  
至今鐵鉢在當底  
手迹穿西開玉像殿  
白佛森比肩抖擻塵埃衣  
禮拜

冰雪顏疊霜為架  
綵貫電為華  
髮逼觀疑鬼功  
其迹非  
雕鐫  
次登觀音堂  
未到聞梅檀上  
堦脫雙履  
歛足升瑤  
筵  
六楹排玉鏡  
四座敷金鈿  
黑夜自光明  
不待燈燭然  
衆寶互低昂  
碧佩珊瑚幡  
風來似天樂  
相觸聲珊珊  
白珠垂露凝  
赤珠滴血殷  
點綴佛髻上  
合為七寶冠  
雙瓶  
白琉璃色若秋水  
寒隔瓶見舍利  
圓轉如金丹  
玉笛何  
代物  
天人施祇園  
吹如秋鶴聲  
可以降靈仙  
是時秋方  
中  
三五月正圓  
寶堂豁三門  
金魄當其前  
月與寶相射

晶光爭鮮妍照人心骨冷竟夕不欲眠曉尋南塔路亂  
竹低嬋娟林幽不逢人寒蝶飛翩翩山果不識名離離  
夾道蕃足以療飢乏摘嘗味甘酸道南藍谷神紫傘白  
紙錢若歲有水旱詔使修蘋蘩以地清淨故獻奠無葷  
羶危石疊四五蟲鬼歌且刈造物者何意堆在巖東偏  
冷骨無人跡苔點如花牋我來登上頭下臨不測淵目  
眩手足掉不敢低頭看風從石下生薄人而上搏衣服  
似羽翮開張欲飛騫巉巉三面峯峰尖刀劍攢悠悠白

雲過決開露青天西北日落時夕暉紅團團千里翠屏  
外走下丹砂丸東南月上時夜氣青漫漫百丈碧潭底  
寫出黃金盤藍水色似藍日夜長潺潺周迴繞山轉下  
視如青環或鋪為慢流或激為奔湍泓澄最深處浮出  
蛟龍涎側身入其中懸磴猶險難捫蘿躡樛木下逐飲  
澗猿雪迸起白鷺錦跳驚紅鱸歇定方盥漱濯去支體  
煩淺深皆洞徹可照腦與肝但愛清見底欲尋不知源  
東崖饒怪石積甃蒼琅玕溫潤發于外其間韞璵璫卞



和死已久良玉多棄捐或時洩光彩夜雨星月連中頂

最高峰挂天青玉竿鮑鮓

音同

上不得豈我能扳援上

有白蓮池紫葩覆清瀾聞名不可到處所非人寰又有

一片石大如方尺輒插在半壁上其下萬仞懸云有過

去師坐得無生禪號為定心石長老世所傳却上謁仙

祠蔓草生綿綿昔聞王氏子羽化升上玄其西曬藥臺

猶對芝朮田時復明月夜上聞黃鶴言迴尋畫龍堂二

叟鬚髮斑想見聽法時歡喜禮印壇復歸泉窟下化作

龍蜿蜒階前石孔在欲雨生白煙往有寫經僧身靜心  
精專感彼雲外鵠羣飛千翩翩來添硯中水去吸巖下  
泉一日三往復時節長不憊經成號聖僧弟子名揚難  
誦此蓮花偈數滿百億千身壞口不壞舌根如紅蓮願  
骨今不見石函尚存焉粉壁有吳畫筆彩依舊鮮素屏  
有褚書墨色如新乾名境與異跡周覽無不殫一遊五  
晝夜欲返仍盤桓我本山人誤為時網牽牽率使讀書  
推挽令儼官既登文字科又忝諫諍員倔直不合時無

益同素餐以此自慙惕戚戚常寡歡無成心力盡未老  
形骸殘今來脫簪組始覺離憂患及為山水遊彌得縱  
疎頑野麋斷羈絆行走無拘攣池魚放入海一往何時  
還身著居士衣手把南華篇終來此山住永謝區中緣  
我今四十餘從此終身閒若以七十期猶得三十年

酬張十八訪宿見贈

昔我為近臣君常稀到門今我官職冷唯君來往頻我  
受狷介性立為頑拙身平生雖寡合合即無緇磷況君

東高義富貴視如雲五侯三相家眼冷不見君問其所  
與遊獨言韓舍人其次即及我我愧非其倫胡為謬相  
愛歲晚逾勤勤落然頽簷下一話夜達晨牀單食味薄  
亦不嫌我貧日高上馬去相顧猶逡巡長安久無雨日  
赤風昏昏憐君將病眼為我犯埃塵遠從延康里來訪  
曲江濱所重君子道不獨愧相親

朝歸書寄元八

進入閣前拜退就廊下食歸來昭國里人卧馬歇鞍却

睡至日午起坐心浩然沉當好時節雨後清和天柿樹  
綠陰合王家庭院寬瓶中鄆縣酒牆上終南山獨眠仍  
獨坐開襟當風前禪僧與詩客次第來相看要語連夜  
語須眠終日眠除非奉朝謁此外無別牽年長身且健  
官貧心甚安幸無急病痛不至苦飢寒自此聊以適外  
緣不能干惟為靜者信難為動者言臺中元侍御早晚  
作郎官未作郎官際無人相伴閒

酬吳七見寄

曲江有病者尋常多掩關又聞馬死來不出身更聞  
有送書者自起出門看素緘署丹字中有瓊瑤篇口吟  
耳自聽當暑忽翛然似漱寒玉冰如聞商風絃首章歎  
時節末句思笑言懶慢不相訪隔街如隔山嘗聞陶潛  
語心遠地自偏君住安邑里左右車徒喧竹葉閉深院  
琴樽開小軒誰知市南地轉作壺中天君本上清人名  
在石堂間不知有何過謫作人間仙常恐歲月滿飄然  
歸紫煙莫忘蜉蝣內進士有同年

舟行江州路上作

帆影日漸高  
閒眠猶未起  
起問鼓枻人已行  
三十里  
船頭有行竈  
炊稻烹紅鯉  
飽食起婆娑  
盥漱秋江水平生  
滄浪意  
一旦來遊此  
何況不失家  
舟中載妻子



御定全唐詩錄卷五十九

# 欽定四庫全書

集部

御定全唐詩錄卷

六十一

詳校官左中允<sub>臣</sub>瑋五珠

主事銜<sub>臣</sub>徐以坤覆勘

總校官原任中允<sub>臣</sub>王燕緒

校對官中書<sub>臣</sub>田尹衡

謄錄監生<sub>臣</sub>馮堪



欽定四庫全書

御定全唐詩錄卷六十

白居易

三

古體詩

三

訪陶公舊宅

并序

予夙慕陶淵明為人往歲渭川閒居常有微陶  
體詩十六首今遊廬山經柴桑過栗里思其人  
訪其宅不能默默又題此詩云

垢塵不污玉靈鳳不啄羶鳴呼陶靖節生彼晉宋間心  
實有所守口終不能言永惟孤竹子拂衣首陽山夷齊  
各一身窮餓未為難先生有五男與之同饑寒腸中食  
不充身上衣不完連徵竟不起斯可謂真賢我生君之  
後相去五百年每讀五柳傳目想心拳拳昔嘗詠遺風  
著為十六篇今來訪故宅森若君在前不慕樽有酒不  
慕琴無絃慕君遺榮利老死此丘園柴桑古邨落栗里  
舊山川不見籬下菊但餘墟中煙子孫雖無聞族氏猶

未遷每逢姓陶人使我心依然

北亭

廬宮山下州湓浦沙邊宅宅北倚高岡迢迢數千尺上  
有青青竹竹間多白石茅亭居上頭豁達門四闢前楹  
捲簾箔北牖施牀席江風萬里來吹我涼淅淅日高公  
府歸巾笏隨手擲脫衣恣搔首坐卧任所適時傾一杯  
酒曠望湖天夕口詠獨酌謠目送歸飛翮慙無出塵操  
未免折腰役偶獲此閒居謬似高人跡

游湓水

四月未全熱，麥涼江風秋。湖山處處好，最愛湓水頭。  
湓水從東來，一派入江流。可憐似縈帶，中有隨風舟。  
命酒一臨汎，捨鞍揚棹謳。放迴岸傍馬，去逐波間鷗。  
煙浪始渺渺，風襟亦悠悠。初疑上河漢，中若尋瀛洲。  
汀樹綠拂池，沙草芳未休。青蘿與紫葛，枝蔓垂相繆。  
繫纜步平岼，回頭望江州。城雉映水見，隱隱如蜃樓。  
日入意未盡，將歸復少留。到官行半歲，今日方一遊。  
此地來何暮，可以

寫吾憂

宿簡寂觀

巖白雲尚屯林紅葉初墮秋光引閒步不知身遠近夕  
投靈洞宿卧覺塵機泯名利心既忘市朝夢亦盡暫來  
尚如此況乃終身隱何以療夜饑一匙雲母粉

睡起晏坐

後亭晝眠足起坐春景暮新覺眼猶昏無思心正住淡  
寂歸一性虛閒遺萬慮了然此時心無物可譬喻本是

無有鄉亦名不用處行禪與坐忘同歸無異路

過李生

蘋小蒲葉短南湖春水生子近湖邊住靜境稱高情我  
為郡司馬散拙無所營使君知性野衙退任閒行行攜  
小榼去逢花輒獨傾半酣到子舍下馬扣柴荆何以引  
我步繞籬竹萬莖何以醒我酒吳音吟一聲須臾進野  
飯飯稻茹芹英白甌青竹筍儉潔無羶腥欲去復徘徊  
夕鴉已飛鳴何當重遊此待君湖水平

食笋

此州乃竹鄉春笋滿山谷山夫折盈抱抱來早市鬻物  
以多為賤雙錢易一束置之炊甑中與飯同時熟紫籜  
折故錦素肌擘新玉每食遂加飧經旬不思肉久為京  
洛客此味常不足且食勿踟躕南風吹作竹

香爐峰下新置草堂即事詠懷題於石上

香爐峰北面遺愛寺西偏白石何鑿鑿清流亦潺潺有  
松數十株有竹千餘竿張翠傘蓋竹倚青琅玕其下

無人居悠哉多歲年有時聚猿鳥終日空風煙時有沉  
冥子姓白字樂天平生無所好見此心依然如獲終老  
地忽乎不知遷架巖結茅宇斲壑開茶園何以洗我耳  
屋頭飛落泉何以洗我眼砌下生白蓮左手攜一壺右  
手挈五絃傲然意自足箕踞於其間興酣仰天歌歌中  
聊寄言言我本野夫誤為世網牽時來昔捧日老去今  
歸山倦鳥得茂樹涸魚反清源捨此欲焉往人間多險  
艱



草堂前開一池養魚種荷日有幽趣

淙淙三峽水浩浩萬頃陂未如新塘上微風動連漪小  
萍如汎汎初蒲正離離紅鯉二三寸白蓮八九枝遶水  
欲成徑護堤方挿籬已被山中客呼作白家池

登香爐峰

迢迢香爐峰心存耳目想終年牽物役今日方一往攀  
蘿躡危石手足勞俯仰同遊三四人兩人不肯上上到  
峰之頂目眩心怵怵高低有萬尋濶狹無數丈不窮視

聽界焉識宇宙廣江水細如繩湓城小於掌紛吾何屑  
屑未能脫塵鞅歸去思自嗟低頭入蟻壤

弄龜羅

有姪始六歲字之為阿龜有女生三年其名曰羅兒一  
始學笑語一能誦歌詩朝戲抱我足夜眠枕我衣汝生  
何其晚我年行已衰物情小可念人意老多慈酒美竟  
須壞月圓終有虧亦如恩愛緣乃是憂惱資舉世同此  
累吾安能去之

截樹

種樹當前軒樹高柯葉繁惜哉遠山色隱此蒙龍間一  
朝持斧斤手自截其端萬葉落頭上千峰來面前忽似  
決雲霧豁達觀青天又如所念人久別一欸顏始有清  
風至稍見飛鳥還開懷東南望目遠心遼然人各有偏  
好物莫能兩全豈不愛柔條不如見青山

題座隅

手不任執殳肩不能荷鋤量力揆所用曾不敵一夫幸

因筆硯功得升仕進途歷官凡五六祿俸及妻孥左右  
有兼僕出入有單車自奉雖不厚亦不至饑飭若有人  
及此傍觀為何如雖賢亦為幸況我鄙且愚伯夷古賢  
人魯山亦其徒時哉無奈何俱化為饑殍念彼益自愧  
不敢忘斯須平生榮利心破滅無遺餘猶恐塵妄起題  
此於座隅

贖鷄

清晨臨江望水禽正誼繁鳬雁與鷗鷺游颺戲朝暾適

有鶩鷄者挈之來遠村飛鳴彼何樂窘束此何冤喔喔  
十四雛罩縛同一樊足傷金距蹢頭搶花冠翻經宿費  
飲啄日高詣屠門遲迴未死間饑渴欲相吞常慕古人  
道仁信及魚豚見茲生惻隱贖放雙林園開籠解索時  
鷄鷄聽我言與爾鏹三百小惠何足論莫學啣環雀崎  
嶇漫報恩

秋日懷杓直

時杓直出  
牧澧州

晚來天色好獨出江邊步憶與李舍人曲江相近住常

云遇清景必約同幽趣若不訪我來還須覓君去開眉  
笑相見把手期何處西寺老胡僧南園亂松樹攜持小  
酒榼吟詠新詩句同出復同歸從朝直至暮風雨忽消  
散江山眇回互潯陽與涪陽相望空雲霧心期自乖曠  
時景還如故今日郡齋中秋光誰共度

對酒示行簡

今旦一樽酒歡暢何怡怡此樂從中來他人安得知兄  
弟惟二人遠別恒苦悲今春自巴峽萬里平安歸復有

雙幼妹笄年未結褵昨日嫁娶畢良人皆可依憂念兩  
消釋如刀斷羈縻身輕心無繫忽欲凌空飛人生苟有  
累食肉常如饑我心既無苦飲水亦可肥行簡勸爾酒  
停杯聽我辭不歎鄉國遠不嫌官祿微但願我與爾終  
老不相離

長慶二年七月自中書舍人出守杭州路次藍溪  
作

太原一男子自顧庸且鄙老逢不次恩洗拔出泥滓既

居可言地願助朝廷理伏閣三上章戇愚不稱旨聖人  
存大體優貸容不死鳳詔停舍人魚書除刺史寘懷齊  
寵辱委順隨行止我自得此心于茲十年矣餘杭乃名  
郡郡郭臨江汜已想海門山潮聲來入耳昔予貞元末  
羈旅曾遊此甚覺太守尊亦諳魚酒美因生江海興每  
羨滄浪水尚擬拂衣行況今兼祿仕青山峰巒接白日  
煙塵起東道既不通改轅送南指自秦窮楚越浩蕩五  
千里聞有賢主人而多好山水是行頗為愜所歷良可



紀策馬渡藍溪勝遊從此始

初出城留別

朝從紫禁歸暮出青門去勿言城東陌便是江南路揚  
鞭簇車馬揮手辭親故我生本無鄉心安是歸處

自秦望赴五松驛馬上偶睡睡覺成吟

長途發已久前館行未至體倦目已昏瞋然遂成睡百  
袂尚垂鞭左手暫委轡忽覺問僕夫纔行百步地形神  
分處所遲速相乖異馬上幾多時夢中無限事誠哉達

人語百齡同一寐

鄧州路中作

蕭蕭誰家邨秋梨葉半折漠漠誰家園  
秋韭花初白路逢故里物使我嗟行役  
不歸渭北村又作江南客去鄉徒自苦  
濟世終無益自問波上萍何如澗中石

山路偶興

筋力未全衰僕馬不至弱又多山水趣  
心賞非寂寞捫蘿上煙嶺躡石穿雲壑  
谷鳥晚仍啼洞花秋不落提籠

復攜榼遇勝時停泊泉憩茶數甌嵐行酒一酌獨吟還  
獨笑此興殊未惡假使在城時終年有何樂

初領郡政衙退登東樓作

鰥惻心所念簡牘手自操何言符竹貴未免州縣勞賴  
是餘杭郡臺榭遶官曹凌晨親政事向晚恣遊遨山冷  
微有雪波平未生濤水心如鏡面千里無纖毫直下江  
最濶近東樓更高煩襟與滯念一望皆遁逃

郡亭

平旦起視事亭午卧掩關除親簿領外多在琴書前況  
有虛白亭坐見海門山潮來一凭檻賓至一開筵終朝  
對雲水有時聽管絃持此聊過日非忙亦非閒山林太  
寂寞朝闕空喧煩惟茲郡閣內器靜得中間

郡中即事

漫漫潮初平熙熙春日空濶遠江山清明好天氣外  
有適意物中無繫心事數篇對竹吟一杯望雲醉行攜  
杖扶力卧讀書取睡久養病形骸深諳閒氣味遙思九

城陌擾擾趨名利今朝是雙日朝謁多軒騎寵者防悔  
尤權者懷憂畏為報高車蓋恐非真富貴

郡齋暇日辱常州陳郎中使君早春晚坐水西館  
書事詩十六韻見寄亦以十六韻酬之

新年多暇日晏起褰簾坐睡足心更慵日高頭未裹徐  
傾下藥酒稍熟煎茶火誰伴寂寥身無絃琴在左遙思  
毘陵官春深物嫋娜波拂黃柳梢風搖白梅朶衙門排  
曉戟鈴閣開朝鎖太守水西來朱衣垂素舸良辰不易

得佳會無由果五馬正相望雙魚忽前墮魚中獲瑰寶  
持翫何磊砢一百六十言字字靈珠顆上申心歎曲下  
叙時輒軻口我切才富不如君道孤還似我敢辭官遠慢  
且貴身安妥勿復問榮枯冥心無不可

### 官舍

高樹換新葉陰陰覆地隅何言太守宅有似幽人居太  
守卧其下間慵兩有餘起嘗一甌茗行讀一卷書早梅  
結青實殘櫻落紅珠稚女弄庭果嬉戲牽人裾是日晚

彌靜巢禽不相呼嘖嘖護兒鵲啞啞母子烏豈惟云烏  
爾吾亦引吾雛

吾雛

吾雛字阿羅阿羅纔七齡嗟吾不才子憐爾無弟兄撫  
養雖驕騃性識頗聰明學母畫眉樣效吾詠詩聲我齒  
今欲墮汝齒昨始生我頭髮盡落落汝頂髻初成老幼不  
相待父哀汝孩嬰緬想古人心慈愛亦不輕蔡邕念文  
姬于公歎緹縈敢求得汝力但未忘父情

題小橋前新竹招客

雁齒小紅橋垂簷低白屋橋前何所有  
冉冉新生竹皮開折褐錦節露抽青玉筠  
翠如可殮粉霜不忍觸閒吟聲未已  
幽翫心難足管領好風煙輕欺凡草木  
誰能有月夜伴我林中宿為君傾一杯  
狂歌竹枝曲

病中逢秋招客夜酌

不見詩酒客卧來半月餘合和新藥草  
尋檢舊方書晚霽煙景度早涼窻戶虛  
雪生衰鬢久秋入病心初卧簾



蘄竹涼風襟印葛踈夜來身較健小飲復何如

除官去未閒

除官去未閒半月恣遊討朝尋霞外寺暮宿波上島新  
樹少於松平湖半連草躋攀有次第賞翫無昏早有時  
騎馬醉兀兀冥天造窮通與生死其奈吾懷抱江山信  
為美齒髮行將老在郡誠未厭歸鄉去亦好

洛下卜居

三年典郡歸所得非金帛天竺石兩片華亭鶴一隻飲

啄供稻梁包裹用茵席誠知是勞費其奈心愛惜遠從  
餘杭郭同到洛陽陌下擔拂雲根開籠展霜翮貞姿不  
可雜高性宜其適遂就無塵坊仍求有水宅東南得幽  
境樹老寒泉碧池畔多竹陰門前少人跡未請中庶祿  
且脫雙驂易買履道宅價不足  
因以兩馬償之豈獨謀吾身安吾鶴與  
石

自詠

夜鏡隱白髮朝酒發紅顏可憐假年少自笑須臾間朱

砂賤如土不解燒為丹玄鬢化為雪未聞休得官咄哉  
箇丈夫心性何情頑但遇詩與酒便忘寢與餐高聲發  
一吟似得詩中仙引滿飲一杯盡忘身外緣昔有醉先  
生席地而幕天於今居處在許我當中眠眠罷又一酌  
酌罷又一篇回面顧妻子生計方落然誠知此事非又  
過知非年豈不欲自改改即心不安且向安處去其餘  
皆老閒

晏起

鳥鳴庭樹上日照屋簷時老去慵轉極寒來起猶遲厚  
薄被適性高低枕得宜神安體穩暖此味何人知睡足  
仰頭坐兀然無所思如未鑿七竅若都遺四肢緬想長  
安客早朝霜滿衣彼此各自適不知誰是非

春葺新居

江州司馬日忠州刺史時栽松滿後院種柳蔭前墀彼  
皆非吾土栽種尚忘疲況茲是我宅葺藝固其宜平旦  
領僕使乘春親指揮移花夾暖室徙竹覆寒池池水變

綠色池芳動清輝尋芳弄水坐盡日心熙熙一物苟可  
適萬緣都若遺設如宅門外有事吾不知

泛春池

白蘋湘渚曲綠篠剡溪口各在天一涯信美非吾有如  
何此庭內水竹交左右霜竹百千竿煙波六七畝泓澄  
動堦砌淡泞

支呂切

映戶牖蛇皮細有紋鏡面清無垢主

人過橋來雙童扶一隻恐污清冷波塵纓先抖擻波上  
一葉舟舟中一樽酒酒開舟不繫去去隨所偶或遶蒲

浦前或泊桃島後未撥落杯花低衝拂面柳半酣迷所  
在倚榜兀回首不知此何處復是人寰否誰知始疏鑿  
幾主相傳受楊家去云遠田氏將非久天與愛水人終  
焉落吾手

此池始楊常侍開鑿中間田氏為主  
予今有之蒲浦桃島皆池上所有

### 新栽竹

佐邑意不適閉門秋草生何以娛野性種竹百餘莖見  
此溪上色憶得山中情有時公事暇盡日遶欄行勿言  
根未固勿言陰未成已覺庭宇內稍稍有餘清最愛近

窻卧秋風枝有聲

寄江南兄弟

分散骨肉戀趨馳名利牽一奔塵埃馬一汎風波船忽  
憶分手時憫然秋風前別來朝復夕積日成七年花落  
城中池春深江上天登樓東南望烏滅煙蒼然相去復  
幾許道里近三千平地猶難見況乃隔山川

寄題藍屋廳前雙松

兩松自仙遊  
山移植縣廳

憶昨為吏日折腰多苦辛歸家不自適無計慰心神手

栽兩樹松聊以當嘉賓春來日一徃生意漸欣欣清韻  
度秋在綠茸隨日新始憐澗底色不憶城中春有時晝  
掩關雙影對一身盡日不寂寞意中如三人忽奉宣室  
詔徵為文苑臣閒來一惆悵長似別交親早知煙翠前  
攀翫不遂巡悔從白雲裏移爾落囂塵

別元九後詠所懷

零落桐葉雨蕭條槿花風悠悠早秋意生此幽閒中况  
與故人別中懷正無悰勿云不相送心到青門東相知



豈在多但問同不同同心一人去坐覺長安空

早秋曲江感懷

離離暑雲散嫋嫋涼風起池上秋又來荷花半成子朱  
顏易消歇白日無窮已人壽不如山年光急於水青蕪  
與紅蓼歲歲秋相似去歲此悲秋今我復來此

寄元九

身為近密拘心為名檢縛月夜與花時少逢杯酒樂唯  
有元夫子間來同一酌把手或酣歌展眉時笑謔今春

除御史前月之東洛別來未開顏塵埃滿樽杓蕙風晚  
香盡槐雨餘花落秋意一蕭條離容兩寂寞况隨白日  
老共負青山約誰識相念心羈鷹與籠鶴

別舍弟後月夜

悄悄初別後去住兩盤桓行子孤燈店居人明月軒平  
生共貧苦未必日成歡及此暫為別懷抱已憂煩况是  
庭葉盡復思山路寒如何不為念馬瘦衣裳單

勸酒寄元九

薤葉有朝露，  
槿枝無宿花。  
君今亦如此，  
促促生有涯。  
既不逐禪僧，  
林下學楞伽。  
又不隨道士，  
山中煉丹砂。  
百年夜分半，  
一歲春無多。  
何不飲美酒，  
胡然自悲嗟。  
俗號消愁藥，  
神速無以加。  
一杯驅世慮，  
兩杯反天和。  
三杯即酩酊，  
或笑任狂歌。  
陶陶復兀兀，  
吾孰知其他。  
況在名利途，  
平生有風波。  
深心藏陷穽，  
巧言織網羅。  
舉目非不見，  
不醉欲如何。

曲江感秋

沙草新雨地岼柳涼風枝三年感秋思併在曲江池早  
蟬已嘹唳晚荷復離披前秋去秋思一一生此時昔人  
三十二秋興已云悲我今欲四十秋懷亦可知歲月不  
虛設此身隨日衰闇老不自覺直到鬢成絲

酬張太祝晚秋卧病見寄

高才淹禮寺短羽翔禁林西街居處遠北闕官曹深君  
病不來訪我忙難往尋差池終日別寥落經年心露濕  
綠蕪地月寒紅樹陰况茲獨愁夕聞彼相思吟上言歡

笑阻下嗟時歲侵容衰晚  
牕鏡思苦秋絃琴一章錦繡  
段八韻瓊瑤音何以報珍重  
慙無雙南金

早朝賀雪寄陳山人

長安盈尺雪早朝賀君喜  
將赴銀臺門始出新昌里  
上堤馬蹄滑中路蠟燭死  
十里向北行寒風吹破耳  
待漏午門外候對三殿裏  
鬚鬢凍生冰衣裳冷如水  
忽思仙遊谷閭謝陳居士  
暖覆褐裘眠日高應未起

初與元九別後忽夢見之  
及寤而書適至兼寄桐

花詩悵然感懷因以此寄

元九初  
謫江陵

永壽寺中語新昌坊北分歸來數行淚悲事不悲君悠  
悠藍田路自去無消息計君食宿程已過商山北昨夜  
雲四散千里同月色曉來夢見君應是君相憶夢中握  
君手問君意何如君言苦相憶無人可寄書覺來未及  
說叩門聲瑟瑟言是商州使送君書一封枕上忽驚起  
顛倒着衣裳開緘見手扎一紙十三行上論遷謫心下  
說離別腸心腸都未盡不暇叙炎涼云作此書夜夜宿

商州東獨對孤燈坐陽城山館中夜深作書畢山月向西斜月前何所有一樹紫桐花桐花半落時復道正相思殷勤書背後兼寄桐花詩桐花詩八韻思緒一何深以我今朝意憶君此夜心一章一遍讀一句十回吟珍重八十字字字化為金

重到渭江舊居

舊居清渭曲開門當蔡渡十年方一還幾欲迷歸路追思昔日行感傷故游處挿柳作高林種桃成老樹因驚

成人者盡是舊童孺試問舊老人半為遶村墓浮生同  
過客前後遞來去白日如弄珠出入光不住人物日改  
變舉目悲所遇回念念我身安得不衰暮朱顏消不歇  
白髮生無數惟有山門外三峰色如故

白髮

白髮知時節閨與我有期今朝日陽裏梳落數莖絲家  
人不慣見憫默為我悲我云何足怪此意爾不知凡人  
年三十外壯中已衰但思寢食味已減二十時况我年



四十本來形貌羸書魔昏兩眼酒病沉四肢親愛日零  
落在者仍別離身心久如此白髮生已遲由來生老死  
二病長相隨除却念無生人間無藥治

酬李少府曹長官舍見贈

低腰復斂手心體不遑安一落風塵下始知為吏難公  
事與日長宦情隨歲闌惆悵青袍袖芸香無半殘賴有  
李夫子此懷聊自寬兩心如止水彼此無波瀾徃徃薄  
書暇相勸強為歡白馬晚蹋雪綠觴春暖寒戀月夜同

宿愛山晴可看野性自相近不是為同官

曉別

曉鼓聲已半離筵坐難久請君斷腸歌送我和淚酒月  
落欲明前馬嘶初別後浩浩閭塵中何由見回首

北園

北園東風起雜花次第開心知須臾落一日三四來花  
下豈無酒欲酌復遲迴所思耿千里誰勸我一杯

秋月

夜初色蒼然夜深光浩然稍轉西廊下漸滿南牕前  
况是綠蕪地復茲清露天落葉聲策策驚鳥影翩翩棲禽  
尚不穩愁人安可眠

朱陳邨

徐州古豐縣有邨曰朱陳去縣百餘里桑麻青氤氳機  
梭聲札札牛驢走紆紆女汲澗中水男採山上薪縣遠  
官事少山深人俗淳有財不行商有丁不入軍家家守  
村業頭白不出門生為陳邨民死為陳邨塵田中老與

幼相見何欣欣一村惟兩姓世世為婚姻親疎居有族  
少長游有羣黃鷄與白酒歡會不隔旬生者不遠別嫁  
娶先近隣死者不遠葬墳墓多遶村既安生與死不苦  
形與神所以多壽考往往見玄孫我生禮義鄉少小孤  
且貧徒學辨是非祇自取辛勤世法貴名教士人重冠  
婚以此自桎梏信為大謬人十歲解讀書十五能屬文  
二十舉秀才三十為諫臣下有妻子累上有君親恩承  
家與事國望此不肖身憶昨旅游初迄今十五春孤舟

三適楚羸馬四經秦書行有饑色夜寢無安魂東西不  
暫住來往若浮雲離亂失故鄉骨肉多散分江南與江  
北各有平生親平生終日別近者隔年聞朝憂卧至暮  
夕哭坐達晨悲苦燒心曲愁霜侵鬢根一生苦如此長  
羨陳邨民

歎老

晨興照青鏡形影兩寂寞少年辭我去白髮隨梳落萬  
化成於漸漸衰看不覺但恐鏡中顏今朝老於昨人年

少滿百不得長歡樂誰謂天地心千齡與龜鶴吾聞善  
醫者今古稱扁鵲萬病皆可治惟無治老藥

我有一握髮梳理何稠直昔似玄雲光今如素絲色匣  
中有舊鏡欲照先歎息自從頭白來不欲明磨拭鵝頭  
與鶴頸至老常如墨獨有人鬢毛不得終身黑

前年種桃核今歲成花樹去歲新嬰兒今年已學步但  
驚物長成不覺身衰暮去矣欲何如少年留不住因書  
今日意徧寄諸親故壯歲不歡娛長年當悔悟

送兄弟回雪夜

日晦雲氣黃東北風切切時從邨南還新與兄弟別離  
襟淚猶濕迴馬嘶未歇欲歸一室坐天陰多無月夜長  
火消盡歲暮雨凝結寂寞滿爐灰飄零上堦雪對雪畫  
寒灰殘燈明復滅灰死如我心雪白如我髮所遇皆如  
此頃刻堪愁絕迴念入坐忘轉憂作禪悅平生洗心法  
正為今宵設

同友人尋澗花

聞有澗底花貫得村中酒與君來較遲已逢搖落後臨  
觴有遺恨悵望空溪口記取花發時期君重攜手我生  
日日老春色年年有且作來歲期未知身健否

別行簡

時行簡辟廬坦  
劍南東川府

漠漠病眼花星星愁鬢雪筋骸已衰憊形影仍分訣梓  
州二千里劍門五六月豈是遠行時火雲燒棧熱何言  
巾上淚乃是腸中血念此早歸來莫作經年別

感鏡



美人與我別留鏡在匣中自從花顏去秋水無芙蓉經  
年不開匣紅塵覆青銅今朝一拂拭自顧顚顚容照罷重  
惆悵背後雙盤龍

### 送春

三月三十日春歸日復暮惆悵問春風明朝應不住送  
春曲江上眷眷東西顧但見撲水花紛紛不知數人生  
似行客兩足無停步日日進前程前程幾多路兵刀與  
水火盡可違之去唯有老到來人間無避處感時良為

已獨倚池南樹今日送春心心如別親故

初出藍田路作

停驂問前路路在秋雲裏蒼蒼縣南道去途從此始絕  
頂忽盤上衆山皆下視下視千萬峰峰頭如浪起朝經  
韓公坂夕次藍橋水潯陽僅四千始行七十里人煩馬  
蹄踓勞苦已如此

仙娥峰下作

我為東南行始登商山道商山無數峰最愛仙娥好差

叅樹若挿匝雲如抱渴望寒玉泉香聞紫芝草青崖  
屏削碧白石床鋪縞向無如此物安足留四皓感彼私  
自問歸山何不早可能塵土中還隨衆人老

寄微之

江州望通州天涯與地未有山萬丈高有江千里濶間  
之以雲霧飛鳥不可越誰知千古險為我二人設通州  
君初到鬱鬱愁如結江州我方去迢迢行未歇道路日  
乖隔音信日斷絕因風欲寄語地遠聲不徹生當復相

逢死當從此別

君遊襄陽日我在長安住君今在通州我過襄陽去襄陽九里郭樓雉連雲樹顧此稍依依是君舊遊處蒼茫蒹葭水中有潯陽路此去更相思江西少親故

去國日已遠喜逢物似人如何合此意江上坐思君有如河嶽氣相合方氣氤狂風吹中絕兩處成孤雲風迴終有時雲合豈無因努力各自愛窮通我爾身

御定全唐詩錄卷六十

欽定四庫全書

御定全唐詩錄卷六十一

白居易

四

古體詩

四

孟夏思渭村舊居寄舍弟

嘖嘖雀引雛稍稍筍成竹時物感人情思我故鄉曲故  
園渭水上十載事樵牧手種榆柳成陰陰覆墻屋兔隱  
豆苗肥鳥鳴桑堪熟前年當此時與爾同遊矚詩書課

弟姪農圃資童僕日暮麥登場天晴蠶拆簇弄泉南澗  
坐待月東亭宿興發飲數杯悶來棋一局一朝忽分散  
萬里仍羈束井鮒思反泉籠鶯悔出谷九江地卑濕四  
月天炎燠苦雨初入梅瘴雲稍合毒泥秧水畦稻灰種  
畬田粟已訝殊歲時仍嗟異風俗閒登郡樓望日落江  
山綠歸雁拂鄉心平湖斷人目如我方漂泊舊里君幽  
獨何時同一瓢飲水心亦足

感情

中庭曬服玩忽見故鄉履昔贈我者誰東隣嬋娟子因  
思贈時語特用結終始永願如履綦雙行復雙止自吾  
謫江郡漂蕩三千里為感長情人提攜同到此今朝一  
惆悵反覆看未已人隻履猶雙何曾得相似可嗟復可  
惜錦表繡為裏况經梅雨來色黯花草死

早秋晚望兼呈韋侍郎

九派繞孤城城高生遠思人煙半在船野水多於地穿  
霞日脚直驅雁風頭利去國來幾時江上秋三至夫君

亦淪落此地同漂寄憫然向隅心摧頽觸籠翅且謀眼前計莫問胸中事潯陽酒甚濃相勸時時醉

夢與李七庚三十三同訪元九

夜夢歸長安見我故親友損之在我左順之在我右云是二月天春風出攜手同過靖安里下馬尋元九元九正獨坐見我笑開口還指西院花仍開北亭酒如言各有故似惜歡難久神合俄頃間神離欠伸後覺來疑在側求索無所有殘燈影閃牆斜月光穿牖天明西北望



萬里君知否老去無見期跼蹐搔白首

過昭君村

邨在歸州東北四十里

靈珠產無種彩雲出無根亦如彼姝子生此遐陋村至  
麗物難掩遽選入君門獨美衆所嫉終棄如塞垣惟此  
希代色豈無一顧恩事排勢須去不得由至尊白黑既  
可變丹青何足論竟埋代北骨不返巴東魂慘淡晚雲  
水依稀舊鄉園妍姿化已久但有邨名存村中有遺老  
指點為我言不取往者戒恐貽來者冤至今邨女面燒

灼成癰痕

初到忠州登東樓寄萬州楊八使君

山東邑居窄峽牽氣候偏林巒少平地霧雨多陰天隱  
隱煮鹽火漠漠燒畬煙賴此東樓夕風月得脩然憑軒  
望所思目斷心涓涓背春有去雁上水無來船我懷巴  
東守乃是關西賢平生已不淺流落重相怜水梗漂萬  
里籠禽囚五年新恩同雨露遠郡隣山川書信雖往復  
封疆徒接連其如美人面欲見杳無緣

西樓夜

悄悄復悄悄城隅隱林杪山郭燈火稀峽天星漢少年  
光東流水生計南枝鳥月沒光沉沉西樓殊未曉

東樓曉

脉脉復脉脉東樓無宿客城闌雲霧多峽深田地窄宵  
燈尚留焰晨禽初展翮欲知山高低不見東方白

寄王質夫

憶始識君時愛君世緣薄我亦吏王畿不為名利着春

尋仙遊洞秋上雲居閣樓觀水潺潺龍潭花漠漠吟詩  
石上坐引酒泉邊酌因話出處心心期老巖壑忽從風  
雨別遂被簪纓縛君作出山雲我為入籠鶴籠深鶴懽  
悴山遠雲飄泊去處雖不同同負平生約今來各何在  
老去隨所託我守巴南城君佐征西幕年顏漸衰颯生  
計仍蕭索方舍去國愁且羨從軍樂舊遊疑是夢往事  
思如昨相憶春又深故山花正落

南賓郡齋即事寄楊萬川

山上巴子城山下巴江水中  
有窮獨人強名為刺史時

時竊自笑刺史如是倉粟餒  
家人黃縑裏妻子

忠州刺史

已下悉以畚田粟  
給祿食黃絹支俸

莓苔翳冠帶霧雨霾樓雉  
衙鼓暮復

朝郡齋卧還起回首望南浦  
亦在煙波裏而我復何嗟  
夫君猶滯此

### 招蕭處士

峽內豈無人所逢非所思  
門前亦有客相對不相知  
仰望但雲樹俯顧惟妻兒  
寢食起居外端然無所為  
東郊

蕭處士聊可與開眉能飲滿杯酒善吟長句詩庭前吏  
散後江畔路乾時請君攜竹杖一赴郡齋期

庭槐

南方繞竹樹惟有青槐稀十種七八死縱活亦支離何  
此郡庭下一株獨華滋蒙蒙碧煙葉嫋嫋黃花枝我家  
渭水上此樹陰前墀忽向天涯見憶在故園時人生有  
情感遇物牽所思樹木猶復爾況見舊親知

東樓竹

瀟灑城東樓，遶樓多修竹。森然一萬竿，白粉封青玉。捲簾睡初覺，欹枕看未足。影轉色入樓，牀席生浮綠。空城絕賓客，向夕彌幽獨。樓上夜不歸，此君留我宿。

東城尋春

老色日上面，歡情日去心。今既不如昔，後當不如今。今猶未甚衰，每事力可任。花時仍愛出，酒後尚能吟。但恐如此興，亦隨日消沉。東城春欲老，勉強一來尋。

花下對酒

藹藹江氣春南賓閨正月梅櫻與桃杏次第城上發紅  
房爛簇火素艷粉圍雪香惜委風飄愁牽壓枝折樓中  
老太守頭上新白髮冷淡病心情暄和好時節故園音  
信斷遠郡親賓絕欲問花前樽依然為誰設

引手攀紅櫻紅櫻落似霰仰首看白日白日委如箭年  
芳與時景頃刻猶衰變況是血肉身安能長強健人心  
苦迷執慕貴憂貧賤愁色常在眉歡容不上面況吾頭  
半白把鏡非不見何必花下杯更待他人勸



東坡種花

持錢買花樹城東坡上栽但構有花者不限桃杏梅百  
果參雜種千枝次第開天時有早晚地力無高低紅者  
霞艷艷白者雪皚皚遊蜂逐不去好鳥亦栖來前有長  
流水下有小平臺時拂臺上石一舉風前杯花枝蔭我  
頭花蕊落我懷獨酌復獨咏不覺月平西巴俗不愛花  
竟春無人來惟此醉太守盡日不能迴

東坡春向暮樹木今何如漠漠花落盡翳翳葉生初每

日領童僕荷鋤仍決渠剗土壅其本引泉溉其枯小樹  
低數尺大樹長丈餘封植未幾時高下齊扶疎養樹既  
如此養民亦何殊將欲茂枝葉必先救根株云何救根  
株勸農均賦租云何茂枝葉省事寬刑書移此為郡政  
庶幾甿俗蘇

步東坡

朝上東坡步夕上東坡步東坡何所愛愛此新成樹種  
植當歲初滋榮及春暮信意取次栽無行亦無數綠陰

斜景轉芳氣微風度新葉鳥下來  
萎花蝶飛去閒攜斑竹杖徐曳  
黃麻屨欲識往來頻青苔成白路

竹窻

常愛輞川寺竹窻東北廊一別十  
餘載見竹未曾忘今春二月初卜  
居在新昌未暇作廢庫且先營一  
堂開牕不糊紙種竹不依行意取  
北簷下窻與竹相當遶屋聲淅淅  
逼人色蒼蒼煙通杳靄氣月透玲  
瓏光是時三伏天天氣熱如湯獨  
此竹窻下朝迴解衣裳輕紗一幅  
巾

小簾六尺牀無客盡日靜有風終夜涼乃知前古人言  
事頗諳詳清風北窻卧可以傲羲皇

曲江感秋

并序

元和二年三年四年予每歲有曲江感秋詩凡  
三篇編在第七集卷是時予為左拾遺翰林學  
士無何貶江州司馬忠州刺史前年遷主客郎  
中知制誥未周歲授中書舍人今遊曲江又值  
秋日風物不改人事屢變况予中否後遇昔壯

今衰慨然感懷復有此作噫人生多故不知明年秋又何許也時二年七月十日云耳

元和二年秋我年三十七長慶二年秋我年五十一中間十四年六年居譴黜窮通與榮悴委運隨外物遂師廬山遠重弔湘江屈夜聽竹枝愁秋看灩堆沒近辭巴郡印又秉綸闡筆晚遇何足言白髮映朱紱消沉昔意氣改換舊容質獨有曲江秋風煙如往日

疎蕪南岼草蕭颯西風樹秋到未幾時蟬聲又無數莎

平綠茸合蓮落青房露今日臨望時往年感秋處池中  
水依舊城上山如故獨我鬢間毛昔黑今垂素榮名與  
壯齒相避如朝暮時命始欲來年顏已先去當春不歡  
樂臨老徒驚悞故作詠懷詩題於曲江路

客中月

客從江南來來時月上弦悠悠行旅中三見清光圓曉  
隨殘月行夕與新月宿誰謂月無情千里遠相逐朝發  
渭水橋暮入長安陌不知今夜月又作誰家客

和錢貞外早冬翫禁中新菊

禁署寒氣遲孟冬菊初拆新黃間繁綠爛若金照碧仙  
郎小隱日心侶陶彭澤秋憐潭上看日慣籬邊摘今來  
此地賞野意潛自適金馬門內花玉山峰下客寒芳引  
清句吟玩煙景夕賜酒色偏宜握蘭香不敵淒淒百卉  
死歲晚冰霜積惟有此花開殷勤助君惜

錢嘗居藍田山下故云

和夢遊春詩一百韻

并序

微之既到江陵又以夢遊春詩七十韻寄予且

題其序曰斯言也不可使不知吾者知知吾者亦不可使不知樂天知吾者吾不敢不使吾子知予辱斯言三復其旨大抵悔既往而悟將來也然予以為苟不悔不悟則已若悔於此則宜悟於彼也反於彼而悟於妄則宜歸於真也況與足下外服儒風內宗梵行者有日矣而今而後非覺路之返也非空門之歸也將安返乎將安歸乎今所和者其章旨卒歸於此夫感不甚



則悔不熟感不至則悟不深故廣足下七十韻  
為一百韻重為足下陳夢遊之中所以甚感者  
叙婚仕之際所以至感者欲使曲盡其妄周知  
其非然後返乎真歸乎實亦猶法華經序火宅  
偈化城維摩經入娼舍過酒肆之義也微之微  
之予斯文也猶不可使不知吾者知幸藏之云

爾

昔君夢遊春夢遊仙山曲恍若有所遇似愜平生欲因

尋菖蒲水漸入桃花谷到一紅樓家愛之看不足池流  
渡清灘草嫩蹋綠蓍門柳闇全低簷櫻紅半熟轉行深  
深院過盡重重屋烏龍卧不驚青鳥飛相逐漸聞玉珮  
響始辨珠履躅遙見窻下人娉婷十五六霞光抱明月  
蓮艷開初旭縹緲雲雨仙氛氤蘭麝馥風流薄梳洗時  
世寬妝束袖輒異文綾裾輕單絲縠裙腰銀線壓梳掌  
金筐蹙帶襯紫蒲萄袴花紅石竹凝情都未語付意微  
相矚眉斂遠山青鬟低片雲綠帳牽翡翠帶被解鴛鴦

襖秀色似堪食穠華如可掬半卷錦頭席斜鋪繡腰褥  
朱唇素指勻粉汗紅錦撲心驚睡易覺夢斷魂難續籠  
委獨棲禽劍分連理木存誠期有感誓志貞無黷京洛  
八九春未曾花裏宿壯年徒自棄佳會應無復鸞歌不  
重聞鳳兆從茲卜韋門女清貴裴氏甥賢淑羅扇夾花  
燈金鞍攢繡轂既傾南國貌遂坦東床腹劉阮心漸忘  
潘楊意方睦新修履信第初食尚書祿九醞備聖賢八  
珍窮水陸秦家重蕭史彥輔憐衛叔朝饌饋獨盤夜醪

傾百斛親賓盛輝赫妓樂紛熠煜宿醉纔解醒朝歡俄  
枕麴飲過君子爭令甚將軍酷酩酊歌鷓鴣顛狂舞鵲  
鵲月流春夜短日下秋天速謝傳隙過駒蕭娘風送燭  
全凋舜花折半死梧桐禿閨鏡對孤鸞哀絃留寡鵠淒  
淒隔幽顯冉冉移寒燠萬事此時休百身何處贖提攜  
小兒女將領舊姻族再入朱門行一傍青樓哭櫪空無  
廐馬水涸失池驚搖落廢井梧荒涼故籬菊莓苔上几  
閣塵土生琴筑舞榭綴蠅蛸歌梁聚蝙蝠嫁分紅粉妾

賣散蒼頭僕門客思傍徨家人泣  
呶喚心期正蕭索宦  
序仍拘跼懷策入嶠  
函驅車辭郊鄔逢時  
念既濟聚學  
思大畜端詳筮仕著  
磨拭穿楊鏃始從讐  
校職首中賢  
良目一拔侍瑤墀再  
升紆繡服誓酬君王  
寵願使朝廷  
肅密勿奏封章清明  
操憲牘鷹韉中病下  
多角當邪觸  
紕謬盡東周申冤動  
南蜀危言詆閹寺直  
氣忤鈞軸不  
忍曲作鈎乍能折為  
玉捫心無愧畏騰口  
有謗譴只要  
明是非何曾虞禍福  
車摧太行路劍落豐  
城獄襄漢問

修途荆蠻指殊俗。謫為江府掾。遣事荊州牧。趨走謁麾  
幢。喧煩視鞭扑。簿書常自領。縲囚每親鞫。竟日坐官曹。  
經旬曠休沐。宅荒渚宮草。馬瘦畝田粟。薄俸等涓毫。微  
官同桎梏。月中照形影。天際辭骨肉。鶴病翅羽垂。獸窮  
爪牙縮。行看鬚間白。誰勸杯中綠。時傷大野麟。命問長  
沙鵬。夏梅山雨漬。秋瘴海雲毒。巴水白茫茫。楚山青簇  
簇。吟君七十韻。是我心所蓄。既去誠莫追。將來幸前勗。  
欲除憂惱病。當取禪經讀。須悟事皆空。無令念將屬。請

思遊春夢此夢何閃倏艷色即空花浮生乃焦穀良姻  
在佳偶頃刻為單獨入仕欲榮身須臾成黜辱合者離  
之始樂兮憂所伏愁恨僧祇長歡樂刹那促覺悟因傍  
喻迷執由當局膏明誘闇蛾陽焮以贖切奔癡鹿貪為苦  
聚落愛是悲林麓水蕩無明波輪迴死生輻塵應甘露  
灑垢待醍醐浴障要智燈燒魔須慧刀戮外熏性易染  
內戰心難衄法句與心王期君日三復微之常以法句及心王頭陀經  
相示故申言  
以卒其志也

雙石

蒼然兩片石厥狀怪且醜俗用無所堪時人嫌不取結  
從胚渾始得自洞庭口萬古遺水濱一朝入吾手擔舁  
來郡內洗刷去泥垢孔黑煙痕深罅青苔色厚老蛟蟠  
作足古劍挿為首忽疑天上落不似人間有一可支吾  
琴一可貯吾酒峭絕高數尺坳泓容一斗五絃倚其左  
一杯置其右窪樽酌未空玉山頽已久人皆有所好物  
各求其偶漸恐少年場不容垂白叟迴頭問雙石能伴



老夫否石雖不能言許我為三友

宿東亭曉興

溫溫土鑪火耿耿紗籠燭獨抱一張琴夜入東齋宿窻  
聲度殘漏簾影浮初旭頭癢曉梳多眼昏春睡足負暄  
簷宇下散步池塘曲南雁去未迴東風來何速雪依瓦  
溝白草遶牆根綠何言萬戶州太守常幽獨

秋池

身閒無所為心閒無所思況當故園夜復此新秋池岼

閣鳥棲後橋明月出時菱風香散漫挂露光參差靜境  
多獨得幽懷竟誰知悠然心中語自問來何遲

朝衣薄且健晚簟清仍滑社近燕影稀雨餘蟬聲歇閒  
中得詩境此境幽難說露荷珠自傾風竹玉相戛誰能  
一同宿共翫新秋月暑退涼早歸池邊好時節

偶作

日出起盥櫛振衣入道場寂然無他念但對一爐香日  
高始就食食亦非膏粱精粗隨所有亦足飽充腸日午

脫巾簪燕息牕下牀清風颯然至卧可致羲皇日西引  
杖屨散步遊林塘或飲茶一盞或吟詩一章日入多不  
食有時惟命觴何以送閒夜一曲秋霓裳一日分五時  
作息率有常自喜老後健不嫌閒中忙是非一以貫身  
世交相忘若問此何許此是無何鄉

閒崔十八宿於新昌樊宅時予亦宿崔家依仁新  
亭一宵偶同兩興暗合因而成咏聊以寫懷

陋巷掩樊廬高居敞華屋新昌七株松依仁萬莖竹松

前月臺白竹下風池綠君向我齋眠我在君亭宿平生  
有微尚彼此多幽獨何必求主人兩心聊自足

慵不能

架上非無書眼慵不能看匣中亦有琴手慵不能彈腰  
慵不能帶頭慵不能冠午後恣情寢午時隨意餐一餐  
終日飽一寢至夜安饑寒亦閒事況乃不饑寒

詠興五首

并序

七年四月予罷河南府歸履道第廬舍自給衣

儲自充無欲無營或歌或舞頽然自適蓋河洛  
間一幸人也遇興發詠偶成五章各以首句命  
為題目

解印出公府

解印出公府抖擻塵土衣百吏放爾散雙鶴隨我歸  
來履道宅下馬入柴扉馬嘶返舊櫪鶴舞還故池鷄犬  
何忻忻隣里亦依依年顏老去日生計勝前時有帛禦  
冬寒有穀防歲饑飽於東方朔樂於榮啓期人生且如

此此外吾不知

出府歸吾廬

出府歸吾廬靜然安且逸更無客干謁時有僧問疾家  
僮十餘人捫馬三四匹慵發經旬卧興來連日出出遊  
愛何處嵩碧伊瑟瑟況有清和天正當疎散日身閒自  
為貴何必居榮秩心足即非貧豈惟金滿室吾觀權勢  
者苦以身徇物炙手外炎炎履水中慄慄朝饑口忘味  
夕惕心憂失但有富貴名而無富貴實

池上有小舟

池上有小舟舟中有胡牀牀前有新酒獨酌還獨嘗熏  
若春日氣皎如秋水光可洗機巧心可蕩塵垢腸岍曲  
舟行進一曲進一觴未知幾曲醉醉入無何鄉夤緣潭  
島間水竹深青蒼身閒心無事白日為我長我若未忘  
世雖閒心亦忙世若未忘我雖退身難藏我今異於是  
身世交相忘

四月池水滿

四月池水滿龜遊魚躍出吾亦愛吾池池邊開一室人  
魚雖異族其樂歸於一且與爾為徒逍遙同過日爾無  
羨滄海蒲藻可委質吾亦忘青雲衡茅足容膝況吾與  
爾輩本非蛟龍匹假如雲雨來祇是池中物

小庭亦有月

小庭亦有月小院亦有花可憐好風景不解嫌貧家菱  
角執笙簧谷兒抹琵琶紅綃信手舞紫綃隨意歌村歌  
與社舞客哂主人誇但問樂不樂豈在鐘鼓多客告暮



將歸主稱日未斜請客稍深酌願見朱顏酡客知主意  
厚分數隨後加堂上燭未秉坐中冠已栽左顧短紅袖  
右命小青娥長跪謝貴客蓬門勞見過客散有餘興醉  
卧獨吟哦幕天而席地誰奈劉伶何

秋涼閒卧

殘暑晝猶長早涼秋尚嫩露荷散清香風竹含疎韻幽  
閒竟日卧衰病無人問薄暮宅門前槐花深一寸

山遊示小妓

雙鬟垂未合三十纔過半本是綺羅人今為山水伴春  
泉共揮弄好樹同攀翫笑容花底迷酒思風前亂紅凝  
舞袖急黛慘歌聲緩莫唱楊柳枝無腸與君斷

裴侍中晉公以集賢林亭即事詩二十六韻見贈

猥蒙徵和才拙詞繁輒廣為五百言以申酬獻  
三江路千里五湖天一涯何如集賢地中有平津池  
池勝主見覺景新人未知竹森翠琅玕水深洞琉璃水竹  
以為質質立而文隨文之者何人公來親指麾踈鑿出

人意結構得地宜靈襟一搜索勝槩無遁遺因下漲沼  
沚依高築堦基嵩峰見數片伊水分一支南溪修且直  
長波碧逶迤北館壯復麗倒影紅參差東島號晨光泉  
曜迎朝曦西嶺召夕陽香暖留落暉前有水心亭動蕩  
架漣漪後有開闔堂寒溫變天時幽泉鏡泓澄怪石山  
欹危春葩雪漠漠夏果珠離離主人命方舟宛在水中  
坻親賓次第至酒樂前後施解纜始登汎山遊仍水嬉  
沿洄無滯礙向背窮幽奇瞥過遠橋下飄旋深澗陞管

絃去縹緲羅綺來霏微棹風逐舞迴梁塵隨歌飛宴餘  
日云暮醉客未放歸高聲索彩牋大笑催金卮唱和筆  
走疾問答杯行遲一詠清兩耳一酣暢四肢主客忘貴  
賤不知俱是誰客有詩魔者吟哦不知疲乞公殘紙墨  
一掃狂歌詞維云社稷臣赫赫文武姿十授丞相印五  
建大將旗四朝致勛華一身冠皐夔去年才七十決赴  
懸車期公志不可奪君恩亦難希從容就中道俛偃  
來保釐貂蟬雖未脫鸞鳳已不羈歷徵今與古獨步無等

夷陸賈功業少二疏官秩卑乘舟范蠡懼辟穀留侯饑  
豈若公今日身安家國肥羊祜在漢南空留峴首碑柳  
惲在江南祇賦汀洲詩謝安入東山但說攜蛾眉山簡  
醉高陽唯聞倒接羅豈如公今日餘力兼有之願公壽  
如山安樂長在茲願我比蒲稗永得相因依

晚歸香山寺因詠所懷

我年日已老我身日已閒閒出都門望但見水與山闕  
塞碧巖巖巖伊流清潺潺中有古精舍軒戶無局闕岍草

歇可藉逕蘿行可攀朝隨浮雲出夕與飛鳥還我道本  
迂拙世途多險艱嘗聞嵇呂輩尤悔生疎頑巢悟入箕  
穎皓知返商顛豈惟樂肥遁聊復祛憂患吾亦從此去  
終老伊嵩間

送呂漳州

今朝一壺酒言送漳州牧半自要閒遊愛花憐草綠花  
前下鞍馬草上攜絲竹行客飲數杯主人歌一曲端居  
惜風景屢出勞僮僕獨醉似無名借君作題目

洛陽有愚叟

洛陽有愚叟，白黑無分別。浪跡雖似狂，謀身亦不拙。點  
檢盤中飯，非精亦非糯。點檢身上衣，無餘亦無闕。天時  
方得所，不寒復不熱。體氣正調和，不饑仍不渴。閒將酒  
壺出，醉向人家歇。野食或烹鮮，寓眠多擁褐。抱琴榮啟  
樂，荷插劉伶達。放眼看青山，任頭生白髮。不知天地內，  
更得幾年活。從此到終身，盡為閒日月。

和裴侍中南園靜興見示

池館清且幽高懷亦如此有時簾動風盡日橋照水靜  
將鶴為伴閒與雲相似何必學留侯崎嶇覓松子

睡後茶興憶楊同州

昨晚飲太多嵬峩

並上聲

連宵醉今朝殮又飽爛漫移

睡睡足摩挲眼眼前無一事信脚遶池行偶然得幽致  
婆娑綠陰樹斑駁青苔地此處置繩床傍邊洗茶器白  
瓷甌甚潔紅爐炭方熾沫下麴塵香花浮魚眼沸盛來  
有佳色嚙罷餘芳氣不見楊幕巢誰人知此味



旱熱

彤雲散不雨赫日吁可畏端坐猶揮汗出門豈容易忽  
思公府內青衫折腰吏復想驛路中紅塵走馬使征夫  
更辛苦逐客彌顛顚日入尚趨程宵分不遑寐安知北  
牕叟偃卧風颯至簾拂碧龍鱗扇搖白鶴翅豈惟身所  
得兼示心無事誰言苦熱天元有清涼地

勃勃旱塵氣炎炎赤日光飛禽颭將墜行人渴欲狂壯  
者不耐饑饉火燒其腸肥者不禁熱喘息汗如漿此時

方自悟老叟亦何妨肉輕足健逸髮少頭清涼薄食不  
饑渴端居省衣裳數匙梁飯冷一領綃衫香持此聊過  
日焉知畏景長

春遊

上馬臨出門出門復逡巡迴頭問妻子應怪春遊頻誠  
知春遊頻其奈老大身朱顏去復去白髮新更新請君  
屈十指為我數交親大限年百歲幾人及七旬我今六  
十五走若下坂輪假使得七十祇有五度春逢春不遊

樂但恐是癡人

題天竺南院贈閒元旻清上人

雜芳澗草合繁綠巖樹新山深景候晚四月有餘春竹  
寺過微雨石逕無纖塵白衣一居士方袍四道人地是  
佛國土人非俗交親城中山下別相送亦殷勤

飲後戲示弟子

吾為爾先生爾為吾弟子孔門有遺訓復坐吾告爾先  
生饌酒食弟子服勞止孝敬不在他在茲而已矣欲我

少憂愁欲我多歡喜無如醞好酒酒須多且旨旨即賓  
可留多即壘不恥吾更有一言爾宜聽入耳人老多憂  
貧人病多憂死我今雖老病所憂不在此憂在半酣時  
樽空坐客起

晚起閒行

皤然一老子擁裘仍隱几坐穩夜忘眠卧安朝不起  
來無可作閉目時叩齒靜對銅爐香暖漱銀餅水午齋  
何儉潔餅與蔬而已西寺講楞伽閒行一隨喜

二年三月五日齋畢開素當食偶吟贈妻弘農郡

君

睡足肢體暢晨起開中堂初旭泛簾幕微風拂衣裳二  
婢扶盥櫛雙童舁簟牀庭東有茂樹其下多陰涼前月  
事齋戒昨日散道場以我久蔬素加籩仍異糧魴鱗如  
白雪蒸炙加桂薑稻飯紅似花調沃新酪漿佐以脯醢  
味間之椒薤芳老憐口尚美病喜鼻聞香嬌駭三四孫  
索哺遶我傍山妻未舉案饒叟已先嘗憶同牢忝初家

貧共糟糠今食且如此何必烹猪羊況觀姻族間夫妻  
半存亡偕老不易得白頭何足傷食罷酒一杯醉飽吟  
又狂緬想梁高士樂道喜文章徒誇五噫作不解贈孟  
光

不出門

彌月不出門永日無來賓食飽更拂牀睡起一頓伸輕  
簑白鳥羽新簾青箭筠方寸方丈室空然兩無塵披衣  
腰不帶散髮頭不巾袒跣北牕下葛天之遺民一日亦

自足況得以終身不知天壤內目我為何人



御定全唐詩錄卷六十一